

CENTRALNA BANKA BOSNE I HERCEGOVINE

Na osnovu člana 2. stava 3. tačke h., člana 7. tačke e., člana 39. i člana 42. Zakona o Centralnoj banci Bosne i Hercegovine ("Službeni glasnik Bosne i Hercegovine", 1/97), te izvršene konsultacije sa Predsjedništvom Bosne i Hercegovine i Odluke Visokog predstavnika OHR za Bosnu i Hercegovinu o dizajnu novčanica konvertibilne marke, Upravno vijeće Centralne banke Bosne i Hercegovine na 9. sjednici od 28. maja 1998. godine, donosi

O D L U K U **o izdavanju i puštanju u opticaj novčanica** **konvertibilne marke**

I Izdavanje novčanica

1. Centralna banka Bosne i Hercegovine (u daljnjem tekstu: Centralna banka) štampala je novčanice konvertibilne marke (u daljnjem tekstu: KM) kao zakonito sredstvo gotovinskog plaćanja u Bosni i Hercegovini.

2. Novčanice KM štampane su u slijedećim apoenima: 50 pfeninga (u daljnjem tekstu: PF), 1 KM, 5 KM, 10 KM, 20 KM, 50 KM i 100 KM.

3. Sve novčanice KM u apoenima navedenim u tački 2. ove odluke, štampane su u dvije verzije, koje imaju određene zajedničke - jedinstvene elemente, kao i određene različite - specifične elemente dizajna izabrane od predstavnika entiteta: Federacije Bosne i Hercegovine i Republike Srpske.

4. Obje verzije novčanica KM po Zakonu o Centralnoj banci Bosne i Hercegovine ravnopravne su i obavezne su ih prihvatiti, kada im se ponude u gotovinskim plaćanjima, sve javne institucije i privatna lica ili preduzeća u poravnanju i plaćanju bilo kojih obaveza prema njima, na cijeloj teritoriji Bosne i Hercegovine.

II Puštanje u opticaj novčanica

5. Novčanice KM u apoenima: 50 PF, te 1 KM, 5 KM i 10 KM stavit će se u opticaj 22. juna 1998. godine.

6. Novčanice KM u apoenima: 20 KM, 50 KM i 100 KM stavit će se u opticaj do početka avgusta 1998. godine.

III Tekst i pismo na novčanicama

7. Nominalne vrijednosti svih novčanica izražene su uočljivim brojevima i riječima na obje strane i nose faksimil potpisa guvernera.

8. Na svim novčanicama ispisan je naziv Centralna banka Bosne i Hercegovine na latiničnom i ćiriličnom pismu u naizmjeničnom redosljedu, tako da je u jednoj verziji na prvom mjestu tekst ispisan latiničnim pismom, a ispod toga ćiriličnim i obrnuto, u drugoj verziji tekst je na prvom mjestu ispisan ćiriličnim pismom, a ispod toga latiničnim.

IV Dizajn novčanica

9. Na licu novčanica, u verziji kod koje je tekst na prvom mjestu ispisan latiničnim pismom, nalaze se portreti pisaca koje su predložili predstavnici Federacije Bosne i Hercegovine. U ovom slučaju, ispod odnosnog portreta ime pisca napisano je latiničnim pismom.

10. Na licu novčanica, u verziji kod koje je tekst na prvom mjestu ispisan ćiriličnim pismom, nalaze se portreti pisaca koje su predložili predstavnici Republike Srpske. U ovom slučaju, ispod odnosnog portreta ime pisca napisano je ćiriličnim pismom.

11. Na naličju svake novčanice, sa latiničnim pismom na prvom mjestu, slika je bazirana na fragmentima stećaka, a kod novčanica sa ćiriličnim pismom na prvom mjestu, slika je vezana za osobu čiji se portret nalazi na licu novčanice (kao na primjer: kuća, most, drveće, hljeb, gusle, knjige i olovke).

12. Na svim apoenima u obje verzije novčanica dat je jednak pozadinski numizmatički uzorak i zajednički (isti) raspored svih elemenata, sa glavnim crtežom na obje strane novčanice, štampanim na gios pozadini koja je smještena nasuprot numizmatičke pozadine.

13. Svaka novčanica nosi atribut zakonskog sredstva gotovinskog plaćanja u nominalnoj vrijednosti na cijeloj teritoriji Bosne i Hercegovine, bez obzira na specifične elemente kao što su portreti pisaca i tekstualni redosljed pisma.

V Zaštitne karakteristike

14. Novčanice imaju jake sigurnosne karakteristike, odnosno karakteristike tolerancije, kao što su: vodeni pečat, sigurnosna nit, sjajna traka, nevidljiva fluorescentna tinta, vidljiva fluorescentna tinta sa duginim efektom i serijske brojeve. Za sve novčanice vodeni pečat je ± 3 mm, a sigurnosna nit je ± 6 mm. Na novčanicama od 50 PF, 1 KM i 10 KM nalazi se sjajni pokrov od $\pm 0,5$ mm.

VI Specifični elementi

15. Specifični elementi novčanica svake nominalne vrijednosti su slijedeći:

a) Veličina novčanice od 50 PF je 60 mm x 120 mm. Plave je boje. U verziji kod koje je tekst na prvom mjestu ispisan latiničnim pismom, na licu novčanice je portret Skendera Kulenovića. U verziji kod koje je tekst na prvom mjestu ispisan ćiriličnim pismom, na licu novčanice je portret Branka Ćopića.

b) Veličina novčanice od 1 KM je 60 mm x 120 mm. Zelene je boje. U verziji kod koje je tekst na prvom mjestu ispisan latiničnim pismom, na licu novčanice je portret Ivana Franje

Jukića. U verziji kod koje je tekst na prvom mjestu ispisan ćiriličnim pismom, na licu novčanice je portret Ive Andrića.

c) Veličina novčanice od 5 KM je 62 mm x 122 mm. Ljubičaste je boje. U obje verzije, odnosno u verziji kod koje je tekst na prvom mjestu ispisan latiničnim pismom, kao i u verziji kod koje je tekst na prvom mjestu ispisan ćiriličnim pismom, na licu novčanice je portret Meše Selimovića.

d) Veličina novčanice od 10 KM je 65 mm x 130 mm. Narandžaste je boje. U verziji kod koje je tekst na prvom mjestu ispisan latiničnim pismom, na licu novčanice je portret Mehmedalije Maka Dizdara. U verziji kod koje je tekst na prvom mjestu ispisan ćiriličnim pismom, na licu novčanice je portret Alekse Šantića.

e) Veličina novčanice od 20 KM je 68 mm x 138 mm. Sive je boje. U verziji kod koje je tekst na prvom mjestu ispisan latiničnim pismom, na licu novčanice je portret Antuna Branka Šimića. U verziji kod koje je tekst na prvom mjestu ispisan ćiriličnim pismom, na licu novčanice je portret Filipa Višnjića.

f) Veličina novčanice od 50 KM je 71 mm x 146 mm. Crvene je boje. U verziji kod koje je tekst na prvom mjestu ispisan latiničnim pismom, na licu novčanice je portret Muse Ćazima Ćatića. U verziji kod koje je tekst na prvom mjestu ispisan ćiriličnim pismom, na licu novčanice je portret Jovana Dučića.

g) Veličina novčanice od 100 KM je 74 mm x 154 mm. Smeđe je boje. U verziji kod koje je tekst na prvom mjestu ispisan latiničnim pismom, na licu novčanice je portret Nikole Šopa. U verziji kod koje je tekst na prvom mjestu ispisan ćiriličnim pismom, na licu novčanice je portret Petra Kočića.

Naličje svake novčanice u obje verzije ima specifične elemente kao u tački 11. ove odluke.

16. Ova odluka stupa na snagu danom objavljivanja u službenim listovima Bosne i Hercegovine, Federacije Bosne i Hercegovine i Republike Srpske.

UV broj: 11 /98
28. maj 1998. godine
Sarajevo

Predsjedavajući
Upravnog vijeća Centralne banke
Bosne i Hercegovine
G U V E R N E R
Peter Nicholl